

Mantegnair la pasch linguistica

La politica grischuna sto sa fatschentar cun la lingua estra en scola

DAD ANDREAS CADONAU / ANR

■ **Giuseppe Falbo da la Pro Grigioni Italiano sco Johannes Flury da la Lia Rumantscha han pri enonuschientscha dal verdict da Losanna pertugant l'iniziativa per sulet ina lingua estra en scola primara. Eventualas discriminaziuns dal talian u dal rumantsch na vegnan las duas organizaziuns betg ad acceptar.** Il secretari da la Pro Grigioni Italiano, *Giuseppe Falbo*, n'è betg intgantà dal verdict da Losanna, in verdict ch'el ha persequità en il lieu. La Pro Grigioni Italiano (PGI) ha organisà il recurs avant il tribunal federal, signà quel han dentant sulet persunas singulas cun il dretg da vuschar en il chantun Grischun. Las organizaziuns sezzas n'han betg gi il dretg da far recurs. Sin fundament da las explicaziuns dals derschaders da Losanna vesa il secretari da la PGI bassegn d'agir tar la constituziun chantunala e la lescha la linguatgs grischuna che na possa betg proteger las minoritads linguisticas dal chantun Grischun. El pretenda da la vart da la confederaziun daplì engaschi per mantegnair l'instrucziun da las linguas naziunals en l'instrucziun da la scola primara. Il president da la Lia Rumantscha, *Johannes Flury*, ha fatg attent a la situaziun cun sulet ina lingua estra en scola primara che pudess dischavantiar ils scolars da la scola rumantscha sche l'iniziativa vegnia approvada. Cunzunt là nua che scolars e scolars dad ina scola primara rumantscha e dad ina scola primara tudestga vegnian instruidi en in stgalim superiur communabel. La pussaivladad dad egualisar sin quest nivel las diversas abilitads linguisticas en las linguas estras differentas da la scola primara saja pussaivel sulet cun sforzs sup-

plementars dals purtaders da las scolars e cun considerabels custs supplementars. Flury ha ditg che la Lia vegnia a persequitar il process politic proxim ed ella na vegnia betg ad acceptar ina eventuala discriminaziun dal rumantsch.

Intensivas discussiuns politicas

Falbo ha fatg attent al messadi che la regenza grischuna vegnia a stuair elavurar per mauns dal cussegl grond che vegnia a tractar l'iniziativa. I vegnia a dar ina discussiun interessanta e tensiva. Segirmain vegnia la Pro Grigioni Italiano a prender posiziun en chausa ed il secretari da la PGI quinta cun ina buna collavuraziun cun la Lia Rumantscha. Pri enonuschientscha da la decisiun da Losanna ha era *Bruno Claus*, deputà e president da la Partida liberaldemocrata. El è stà in

dals iniziants per sulet ina lingua estra en scola primara, è dentant s'exprimì en il cussegl grond per declerar l'iniziativa per nunvalaivla. Impurtant è tenor sia optica la pasch linguistica en il chantun Grischun e che quella na vegnia betg periclitada entras la nova situaziun. Las circumstanzas linguisticas en il Grischun sajan fitg differentas ed in consens en chausa instrucziun da lingua grev da chattar. Claus ha menziunà la pussaivladad dad elavurar ina cuntraproposta en il cussegl grond e suttemetter quella da cuminanza cun la iniziativa al suveran grischun. Stipular il talian sco emprima lingua estra en scola enstagl igl engles fiss ord sia optica ina sligaziun che pudess simplifitgar la situaziun. Vegn numnadmain l'iniziativa realisada quinta era Claus cun considerabels custs supplementars per ils purtaders da scola.



Entras il gea dal tribunal federal turna l'iniziativa per sulet ina lingua estra en scola primara en il cussegl grond.

FOTO M. HARTMANN